

Bronz pil Tuatschin Yannick Flepp

Yannick Flepp da Sedrun ha gudignau la medaglia da bronz als campiadis mundials da professiun a Salzburg. Tut en tut ei la Svizra danovamein la meglia naziun europèa a quels campiadis.

Ils campiadis mundials ein vegni arranschai uonn a moda decentrala. El decuors dils davos treis meins han els giu liug en 15 differentas tiaras. La fin d'jamna ein els vegni terminai a Salzburg. Leu ein giuvnas e giuvens semesirai en differentas professiuns. Ils 34 participonts svizzers han acquistau en tut 19 medaglias, ina da quellas – ina medaglia da bronz – entras *Yannick Flepp* da Sedrun. El ha concurrenzau culs meglia electrotechnic e ha stuiu sutta cummer suletamein a *Mo Hao Jiang* dalla China ed *Edgar Monteiro* dil Portugal. Ensemen cun Yannick Flepp han *Yeongmin Kim* dalla Corea dal Sid e *Ting-An Chien* dil Taiwan contonschiu il tierz rang. Ella categoria dils electrotechnic han ils participonts giu da d'installar, reparar e far lavurs da manteniment da systems da produziun industrials.

Exercitau 1000 uras

Yannick Flepp ha saviu separticipar al campiadis mundial suenter ch'el ei daventaus campiuon svizzer da professiun igl onn 2020. Sco quei ch'el ha detg ad RTR, ha el reduciu siu pensum da lavur il mars 2022, per aschia saver sepreparar optimalmein sil campiadis mundial. «Ils davos nov meins hai jeu trenau 1000 uras. Ei ha cunzun giu num imprendder da luvrar fetg schuber, exact e spert.» La pli gronda sfida seigi il temps staus. Al campiadis ha el stuiu far ina lavur en 14 uras, normalmein stat per quella 20 uras a disposiziun. Buca mo la lavur pratica ei impurtonta, mobein era quella cul computer. Per che mintga apparat funcziuni, sto l'installaziun vegnir programmada. Programmar ei stau ina pintga part digl imprendessadi e perquei ha Yannick Flepp stuiu imprendder quei bunamein da furs ensi. «Spel cumbat cul temps ei il programmar stau ina gronda sfida», di Yannick Flepp. (cdm/rtr/fmr)



Yannick Flepp ei returnaus culla medaglia da bronz da Salzburg.